

四庫全書

集部

欽定四庫全書

集部

五百家播芳大全文粹卷二十六

詳校官編修_臣謝振定

助教_臣常循覆勘

總校官編修_臣王燕緒

校對官中書_臣葉蘭

謄錄監生_臣張護

欽定四庫全書

五百家播芳大全文粹卷二十六

宋 魏齊賢

葉 棻同輯

賀啓

賀正

賀定帥寶文正啓

張欽夫

伏以魯史書元謹天地化生之始羲文畫泰貴聖賡道

長之初伏惟某官才茂天資學探經奧遇會光華之旦
徊翔侍從之班茲暫委於兵藩宜亟膺於召節履是元
正之吉茂迎神貺之多某阻奉慶觴第深馳詠

賀太守龍圖正啓

闕名

伏以日舍星虛律回太簇漢舉三朝之慶魯開五始之
祥恭惟某官智識敏強器能寬裕出值文明之會顯升
侍從之班茲暫委於介藩宜亟膺於召節履茲元序倍
擁純禧某阻致慶于壽觴第馳誠於賓廡其為頌詠罔

喻勤倦

賀太守待制正啓

程子山

伏審堯歷闡端夏正謹始遘三陽之並進宜百福之叢
來伏惟某官忠結主知德諧人望摠百城之師律深藉
沉謀職列聖之奎文久聯法從履是元正之序順迎神
眎之休某拜晤末期詠瞻無數勉祈珍護密副眷懷

賀都督正啓

張德美

麟經謹始大一統於天王鳳歷推元謹三微於君德方

仁主行慶而施惠且王師振旅而策勲咸與維新罔不
率俾恭惟某官量廣滄海德尊泰山仁及海隅德高天
下歲足以振讐絕域功足以建立中興當正月之始和
有東風之八律取泰於否已克相天地之宜申命行師
將盡復文武之士乘三陽之方長扈八駿以言還捷書
塞於置郵歡聲洋溢於奏凱洛陽宮殿覺寒盡而春生故
國山河豁天開而地闢某雖望雲而有路欲駕馬以無
車纖草何功尚想舊年之雨露昆蟲微命亦思起蟄之

之雷霆

賀摠領正啓

毛伯穎

正月之吉始和兩儀交泰人道所貴曰福百順同升恭
惟某官迪德純誠凝姿溫厚偉量吞乎雲澤和氣藹于
陽春卿月呈祥夙被九重之眷倚使星臨次允為六路
之光華履茲令辰倍擁殊祉某阻趨慶壽第切馳情輒
布緘滕益增歡於賀履行觀綸綍當進擢於秉鈞祝頌
之私數陳罔既

賀帥司正啓

王叔子

伏以璿璣正始嗣更一歲之端玉燭推移簇達三陽之
統伏惟某官謀猷閎遠器識淵深直道致身為士林之
表式精忠許國拱廟祐之晏寧劇易一於誠忱出處安
於義分况茲吉日宜集善祥某阻致慶於壽觴第馳情
于賓廡其為禱頌罔既敷陳

賀帥司正啓

楊祐甫

伏以孟陬起歲上日標年屬庥運之布新宜佳辰之薦

祉恭惟某官才兼文武德備忠嘉學術冠映士林謨謀
輔相王室睿懷倚任固有異于陪京碩福繁昌宜亟還
于元弼順履元正之吉密迎神貺之休某屬守藩條阻
獻壽筭永言祈頌曷罄喻言

賀漕使正啓

宋祈公

杓建孟陬交三陽而為泰灰飛太簇滋一氣以回春恭
惟某官明允篤誠博大靜重鍾西南之秀氣歷中外之
要津輓粟江湖善最已高於諸路垂紳廊廟迓除佇聽

於崇朝履茲令辰倍擁殊祉某阻趨薦壽第切馳情輒
布緘滕益增歡於賀厦行觀綸綍當近擢于秉鈞祝頌
之私敷陳罔既

賀漕使正啓

李吉甫

竊以天統開端王正謹始稱壽觴于柏葉賡慶福於椒
花恭惟某官德粹而剛識明以恕奧學藹騰於僉論駿
功簡在于淵衷未還扈從之華班尚屈輸將之重寄方
三陽之朋進宜百祿之具膺某蒙託恩床間遥賓廡旅

進莫投于刺謁驛馳敢摯于書牋

賀憲使正啓

吳有光

簇律飛灰交三陽而為泰寅杓連位肇一氣以回春恭
惟某官學富儒宗才全王佐鯁亮素高於臺閣忠嘉自
結於冕旒揔按邦刑允重平反之寄暫兼帥閫更資屏
翰之方履茲令辰倍擁殊祉某阻趨薦壽第切馳情

賀監司正啓

周子充

經書五始歷謹三朝物與歲以更新人自天而錫祉伏

惟某官望隆鎮俗德厚提躬著微譽於熙朝倚劇權于
要路迪乃心之勤勩底所部之澄清佇懋勞庸入躋臚
仕屬茲元吉宜亨休嘉某莫階布頌之誠第切嚮風之
想

賀監司正啓

王晦叔

天地既交在時為泰君子寢長與物偕通恭惟某官綽
著吏能雅為國器順履吉亨之會茂迎福祿之來佇被
褒陞徑居華要莫遑稱壽但極馳誠祝頌之深喻言奚

既

賀太守正啓

宋文淵

祥開玉歷謹五始於春王肇序銅儀遵三陽於夏正履
端伊始介福尤多恭惟某官道與時隆德隨日進暫爾
藩宣之借重行將廊廟以登庸賢業對時神明薦祉某
尚拘小壘莫造崇墀被和氣於江干欣逢穀旦瞻賀塵
于表著阻奉椒觴

賀太守正啓

王介甫

欽定四庫全書

五百家類書大全文粹
卷二十六

獻歲發春自天降祉方竦瞻於任所阻交致於壽觴伏
以某官德履端方才猷敏妙久鎮臨于邊劇已茂著于
勞能諒因正始之辰倍享宜新之祐某首承榮翰第切
感悰方履濡寒冀加珍護

賀太守正啓

李仲信

伏以五始書元魯史重王春之首六爻交泰義經貴乾
道之亨恭惟某官材茂天資學探道蘊值此黜華之盛
旦久更西北之要權暫專委于价藩宜亟膺於召節履

是元正之序倍迎神貺之休某阻奉慶儀第深馳想

賀太守正啓

孫正之

魯史書元基于陽化羲文畫泰慶于大采伏以某官簡
在上心望隆時棟蘊臯夔之賢業富丙魏之周才協贊
機衡樽俎勝折衝之算從容外守士民馳仰德之誠聊
倚任於帥藩即迂膺於召節履茲昌序茂擁繁禧某阻
致慶於壽觴第馳誠于賓廡

賀太守正啓

闕名

夏正肇建當三陽升進之初鄒律推元實四序履端之
始春已回于萬室慶遂浹于輿心恭惟某官直道事君
深忠許國姑屈專城之任行膺大柄之權適會佳辰宜
膺殊祉賜環天陞式邁其歸正位從班指日而俟某屬
拘外邑阻造台堦稱觴莫遂于鳧趨貢牘敢申於燕賀
微官下士方依東壁之光冷灰枯楊更借熙春之煖

賀太守正啓

陳阜卿

一氣回春三陽交泰蠢然品物俱有向榮之心卓爾仁

賢豈無為善之福恭惟某官溫恭毓性謙慈持身暫鎮
撫於雄藩未究施于遠業茂迎穀旦即奉召除某兼障
非才善鄰是賴阻奉一觴之壽輒修尺牘之書頌詠於
中敷宣罔既

賀太守正啓

李守真

人元開統雞旦更端寅乍建於斗杓律初回於太簇恭
惟某官受天間氣為世偉人早膺睿主之知專任侯藩
之政想茂膺於正旦宜倍擁於殊休某幸托恩闕俯依

台庇屬拘賤職阻奉壽觴輒罄卑誠聊伸慶牘

賀太守正啓

闕名

一氣更端三元集慶玉厯著頒時之紀木鐸施布始之音當品彙之向榮宜仁賢之介祉恭惟某官高明碩德經濟宏材惠洽春風布熙朝之盛意教漸時雨下膏澤於庶民茂對昌辰倍迎戩穀某守官巖邑阻慶台阶躬莫遂于鳬趨誠已深於燕賀卑飛短翼幸棲息于喬林寒谷枯荻賴吹噓於暖律

賀太守正啓

闕名

桃符逐厲俄驚一歲之除椒頌薦馨共慶三朝之會恭
惟某官佐王之學當陪國論承流之寄尚布藩條寅奉
夏時肆頒堯朔進牛鞭而占歲憑熊軾以班春咸欣欣
聞鼓樂之音舉熙熙有登臺之樂東閣之梅紀瑞已開
故歲之花南國之棠交陰留頌他年之慶

賀太守正啓

闕名

夏時御正周歷更端首三統以承乾交兩儀而畫泰恭

惟某官价藩均秩秘殿紬書歷事三朝親逢一旦日月
十二會已符營室之占春秋八千年宜介大椿之壽方
修慶牘遽隆嘉音雖涸轍垂枯久徯卧龍之起而孤根
欲朽空觀萬木之春

賀太守正啓

闕名

五勝代興既周必復一元更始以故為新賢德所臨春
祺攸介恭惟某官碩大光明之傑循良慈惠之師二千
石班春占土牛而得歲五百年住世摩銅狄以興嗟履

運中興逢辰交泰一城喜色欣欣上旄羽之塵四野春
聲籍籍滿袴襦之詠其為瞻頌難盡名言

賀太守正啓

闕名

魯經書五始之元漢儀紀三朝之會繫萬寶化生之日
兆羣賢彙進之祥恭惟某官哲謀肅乂之才正直靖共
之德親逢聖旦方興見晚之嗟順履王春宜介朋來之
祉某自憐老去實聳遐瞻千指蒙休竊託常陰之舍一
觴獻壽莫持椒頌之盤

賀太守正啓

闕名

太史書元上經揲泰三朝謹始萬寶趨新恭惟某官魯國真儒漢京循吏特達李將軍之勇一諾可重于百金妙絕張公子之詩千首固輕于萬戶蓋聲氣相求于一道故深沉靡間于殊途迨茲歲序之更獨見人求之舊賦椒盤之頌莫瞻列炬之光分棠舍之陰亦預班春之澤

賀太守正啓

闕名

門垂葦索盤頌椒花星回斗野之杓春入練江之色恭
惟某官才高帝胄名著吏師與庶民共楚臺之風得賢
者樂齊宮之雪道載土牛之出遥知卿月之臨門闥樞
馬之喧室想德星之聚方納復新之慶尤深懷舊之私
黃絹占詞白衣載酒渴心不展莫預西園飛蓋之游食
指可占詎有北海空尊之嘆其為欣頌莫究敷宣

賀太守正啓

林豈塵

龍躔布朔正一元于七十二候之初鳳歷授時謹五始

于三百六旬之首惟賢人之順履符泰道之吉亨恭惟
某官道直以方氣溫而厲播千里循良之政宣九重寬
大之條薰然和氣以襲人煖若新陽之煥物五百年間
世行應君明臣良之期二千石班春宜介小往大來之
吉羣情胥慶萬福攸同某奔走下僚栖遲大庇椒觴薦
壽慙慶謁之未遑寒谷回春正吹噓之有待

賀太守正啓

闕名

四序密移物無終否三微浸大福有朋來恭惟某官躬

誠明之姿撫休嘉之運九歌申勸每懷天保報上之心
衆正彙興共享既醉太平之福逢辰茲始稱壽宜先自
憐幽屏之餘莫預駿奔之數獨無高論進輸拔薤之忠
尚有寸誠堪賦頌椒之什其為欣願難盡名言

賀太守正啓

闕名

銅渾觀象歲籥代終玉燭宣和春元茲始恭惟某官躬
行古道親值聖時方上聖解絃更化之初應君子連茹
彙征之吉逢辰有俶錫羨惟休黛耜省耕盍致九推之

助脂車入覲更䟽三接之榮

賀太守正啓

闕名

葦桃在戶襍礫以餞餘寒椒柏稱觴燭烈以興嗣歲在
時為泰與物咸新恭惟某官道為儒宗望出民表暫假
蕃宣之寄尚淹廊廟之材方迎道長之期宜享彙征之
福佇參大用俯慰具瞻

賀通判正啓

闕名

一歲肇新氣回仁而溫厚三陽上長卦交泰而吉亨時

遠慶于王春福益隆於君子恭惟某官德推世表道覺
民先宜歸持橐之班暫屈題輿之任侯邦千里既協力
以蕃宣宸詔十行將蒙恩而陟擢當元正之屆序宜繁
祉之駢臻某幸屬部封限居官守弗獲趨參於台屏莫
緣捧獻於壽觴祝頌之深書言曷既

賀通判正啓

闕名

斗轉艮維載頒于堯歷律回人統肇建于夏正更品彙
以發生協羣情而胥慶恭惟某官望推人傑政實吏師

早奮志於周行旋躋榮于別駕暫屈康時之策來臨佐
郡之蕃履正奉公千里播題輿之譽愛民利物一方歌
展驥之才祇恐轉瞬之間別有非常之詔初春在候百
祿是遒如某者碌碌寒生區區末吏奔馳莫遂阻稱椒
柏之觴詠頌惟勤仰祝松椿之壽

賀通判正啓

闕名

日紀孟陬律占太簇一氣協乾元之始三陽同泰道之
亨恭惟某官為時偉人受天間氣名邦貳政暫分千里

之權急節頌恩即近九重之召當履端之謹始宜福壽
之駢臻某獲側下僚仰依大庇顧官箴之有守莫遂稱
觴惟竿牘之是修第深馳慶

賀通判正啓

戴翼

厯日頒元忻際三陽之泰屏星增重懋膺百福之升式
對昌辰恪陳善頌恭惟某官炳炳文章之鳳振振仁厚
之麟聞望顯昂胸襟冲粹共仰泰山北斗平分霽月光
風屬鳳紀之更新宜龍光之鼎至歌騰康海想驥足之

難淹詔下自天佇鵬程之直上某幸依厦屋倏轉春規
無階修敬於壽觴謹用披誠於慶牘春生別駕董陶分
屬邑之輝日奉辦香耆艾頌閼宮之詠

賀通判正啓

闕名

閭闔開黃道聿新鳳歷之先燕寢凝清香誕輯虎符之
瑞春融葭管頌浹椒盤恭惟某官氣涵玉燭之和識造
璣衡之妙昔無襦而今袴汗青邁紀於竹書言如緯而
出綸泥紫已塗於芝宇地天交泰朝野所需某三見姬

嘗一歸塊坻雲深戟衛諒鳴璆蟻泛之春日轉觚稜觀
鏘佩雞人之曉中和氣盡熙皞詠均

賀都統正啓

闕名

四序平分歲星更始三陽暈進卿月高升恭惟某官門
地山西之豪時望南斗之傑磊落掀天地一丸泥可封
百二之關叱咤生風雲半段槍可破十萬之衆爰介春
祺之慶猥先故物之求緹騎鼎來函書拜辱渴心不展
空懷賀厦之私輿論可占行有築壇之拜但深欣頌莫

究名言

賀都統正啓

闕名

履三朝之會方占參尾之中登四海之圖今在斗牛之次有開令序允屬休辰恭惟某官肇復春元密膺帝賚揔戎旃之重有嚴帥閫之雄聯貂冕之華宜視公槐之貴名偕日起道與時亨壽福如臧行致百朋之復老耄而耄又驚一歲之除

賀路分正啓

闕名

炎正嗣興接千齡之統王春肇序登四海之圖惟時百
戰之多宜受朋來之祉恭惟某官鞭笞犬馬之衆號漢
飛將軍駕馭驍虎之師為唐大都督名書鐘鼎勲著
旂常迨茲熙旦之逢益茂春祺之介倚爪牙之衛久外
摠于師干資帷幄之籌盡坐圖于廟勝其為欣頌莫究
名言

賀路鈴正啓

闕名

星紀初回春祺紹至三陽朋進一德上行恭惟某官深

沉雄毅之姿奇龐福艾之相奮空拳而扼虎抗絕藝以屠
龍入護中宸作朕心膂出膺外闡為國爪牙履茲贊陽
出滯之辰宜介小往大來之吉元戎千乘可擬金城百
雉之崇袞服九章行膺台躔六符之象

賀監司屬官正啓

闕名

竊以魯史書元羲經畫泰星躔正位日建寅宮恭惟某
官挺膚敏之才遇緝熙之運雅騰聲于朝野猶贊畫於
計臺順蹈休辰茂臻景福某拘維官次隔越賓除莫躬

薦于壽觴敢驛馳于慶牘

賀正啓

闕名

靈臺觀象知辰集于姪訾緹室候筭驗律回于太簇三陽交泰萬物咸新伏惟某官器局宏深風度凝邃對履端之令節擁米舍之龐休某限守官箴阻陪慶集未遑修于竿牘先辱貺于函牋愧頌之私名言曷罄

賀正啓

闕名

天地既交於時為泰君子寢長與物偕通恭惟某官綽

著更能雅為國器順履吉亨之會茂迎福祿之來佇被
褒陞徑居華要莫遑稱壽但極馳誠祝頌之深喻言奚
既

賀留守正啓

闕名

一歲始而為正三陽交而成泰乃天地資生之會實君
臣受福之時恭惟某官德業亮天誠明周物夙富經綸
之學屹為柱石之材望重兩朝進退必歸乎禮義道高
萬世始終不累于功名神明所扶福祿來附方懇辭于

機政暫出鎮于留都圖任舊人將再調於元化永錫難
老庶大庇於斯民限守官箴阻趨鈞祀

賀正啓

闕名

四時成歲肇見天正七日告期潛升陽德惟一元之資
始見萬彙之嚮生伏惟某官才冠一時能兼數器鷹撮
盧摯凜設施之可觀羊狠狼貪紛遁逃而遠去風政甚
異善最推高履茲新陽宜有厚福某竄身榛莽弔影江
湖望一丈之芳遙阻陪廣坐非百函之妙手愧託尺書

賀正啓

闕名

新歷既頒，蓋履端歸除之歲。羣情交泰，正替陽出滯之辰。恭惟某官厚德鎮時，高名華國。非獨疇咨之用，已簡上心。更膺難老之祥，以符民望。官守所限，展慶末由。欣頌之深，敷陳罔既。

賀正啓

闕名

歲起於東，茂對三陽之盛。物生於震，聿開萬化之端。伏惟某官行應中和，道含純粹。屬四方之繫望，簡三后之

眷懷德為民彝故稱宗廟之器功在王室是為社稷之
臣順履昌期具膺繁祉佇奉承於典冊復登翊於巖廊
某限守印章阻趨墻屏

賀正啓

闕名

獻歲發春驗天時之興廢履端居正觀君子之威儀伏
惟某官抗志不羣誠身以善雄深雅健文為一代之宗
敬義直方名列四科之上出遇亨嘉之會踐更中外之
權致主惠民已著大儒之效因時受祉益隆仁者之年

傾祝之深翰墨莫盡

賀正啓

闕名

伏以百華燈動明庭已樂於稱觴萬寶春回寒谷何妨
於奏律率土雖廣歡心所同伏惟某官元善長人忠誠
許國恩隨天施故其德足以佐王才與時同故其政可
以成國兼孚兩路之民庶率已而先同享三陽之福祥
自天而祐蒞官有限拜壽無緣

賀冬

賀太師冬啓

闕名

爰象見天地之心一陽來復賢哲應亨嘉之會百祿是
適茲視履以考祥宜應時而納祐恭惟太師朝廷元老
社稷大臣措寒緒於覆盆納生靈於安堵觀風雲之際
會度越古今盡日月之照臨傾殫肺腑令旦適逢于剛
長繁禧茂擁于朋來某自顧鯁生得依鴻庇尚阻守符
於遐壘莫陪賀履於崇墀祝頌惟深敷宣罔既

賀太師冬啓

闕名

伏以卦變初爻紀一陽之來復氣鍾子位丁萬物之孳
萌恭惟某官峻德自天純誠憲道聳師瞻於百辟著勲
實於四朝屬此盛時眷於元老既切菟裘之請乃隆鳩
杖之頒鉅節冠映于古今美範儀刑于內外方初陽之
貫序宜百福之在躬某阻奉慶觴第瞻賀廡其為系頌
尤劇蘊悰

賀太師冬啓

闕名

琯灰浮暖一陽初動於黃鐘圭景迎長萬彙咸熙于化

國應受宜民之祿孰先同德之賢恭惟某官運契千齡
仁漸九有雍容廊廟轉一氣於洪鈞鼓舞華戎調四時
於玉燭祥紀卿雲之瑞德侔愛日之輝適三歲以視祠
環百神而受職雖雖肅肅方勤顯相之儀簡簡穰穰遂
叶朋來之慶某忝司外計邈在閩陬垂使者之輶顧銜
恩而有地望翹材之館繫薦壽以無階頌詠攸深名言
罔既

賀少保冬啓

闕名

物資其始蒙萬寶于將亨氣動于微升一陽于方長伏
惟少保名家偉器聖世真才柱石朝家箕裘相業佩服
義方之嚴訓茂隆寅亮之元勲繡縷初長遇朋來之七
日綵衣起舞宜並享于千春

賀宰相冬啓

闕名

準瑟聲明中應清絃之畫律灰衡折初移白琯之春維
時當迎至之期在禮有履長之賀恭惟某官賢德可久
剛道用亨得出處語默之宜悟消長往來之理靜以符

陰陽之定欲存施變理之功復其見天地之心將再宣
寅亮之化姑從五日之樂茂隨百福之休某遙望光躔
敬為善頌上壽中壽下壽凡三壽作朋願續于詩人大
書特書屢書不一書秉筆請從于史氏

賀宰相冬啓

闕名

黃帝得天之統陽復當厯數之元伊尹秉國之鈞時運
際功名之會履三陽之協應荷百祿之寵綏恭惟某官
盛業格天精忠貫日陶鈞萬物運大化以無心底定四

方浩成功而冠古宜及履長之候順膺賞善之休某託
庇鴻鈞備員遠服登觀臺而望祲但期農畝之豐穰念
齒髮之愈衰願遂田廬之休息

賀宰相冬啓

闕名

周主測日方占化國之長魯史書雲肇起觀臺之瑞於
時而復以道則亨恭惟某官變理化元經綸治具輔贊
彌縫而藏諸用動靜語默以順其宜考諸禮經待陰陽
之所定明乎易象知消長之自然茂對朋來肇迎嘉慶

某叨縻印組久辱鈞銘東閣門深阻獻柏觴之壽南州
地遠徒修竿牘之儀

賀宰相冬啓

闕名

竊以剝極而靜復來以亨肇見二儀之元潛萌六氣之
本閉關息務君子得輔相之宜旅地蓄雷聖人謹順行
之象陽德方長陰柔漸消致時咸宜與國同慶禮如元
日古有賀儀況屬坯陶敢稽函摯恭惟昭文相公啓蹕
德業保釐邦本矢謨盡舜臣之心憂國有漢相之體經

綸萬彙師長百寮中外具瞻夷夏矜式摠持政柄協亮
帝工處星上台體貌益峻亨天五福摺紳所難適臨日
至之初宜有神休之格某貳輸東蜀遠跡黃扉阻趨下
列之塵徒切大鈞之庇

賀宰相冬啓

闕名

史書雲物紀麟筆之五年復見天心驗義經之七日恭
惟某官精忠許國巨業濟時遇時見哲人之難以身任
天下之重險夷一節出處兩全商鼎鹽梅夢昔形于帝

賚周詩衮繡人咸跂于公歸展茲長至之辰宜納朋來
之慶某職居佐郡禮廢稱觴輒布露於天書莫趨陪于
文席

賀宰相冬啓

闕名

布律而候氣萌動於黃宮立表以須景長至於南極伏
惟某官受材閎廓含德粹純壯經國之大猷濟格天之
盛業履茲令序茂集休祺典冊衮衣矜履三公之位旂
常鼎彝當傳萬世之功某祇服官箴遠違門著素積依

歸之望彌深禱頌之勤

賀宰相冬啓

闕名

氣肇黃宮本天正而成三統道隆台輔熙帝載以叙九
功方厯數之迎長宜福祥之視履恭惟某官淵謨經世
亮節致君鞏固宏謀自保棟隆之吉變和大化聿致昂
飪之調宜膺陽復之亨懋享神祺之介顧惟哀迹久託
鴻鈞仰占雲物之祥無裨大化慨想林臯之適以畢餘
生

賀兩府冬啓

闕名

伏以周髀占天田建星于北陸子雲推易起中首于黃
宮物賡微陽時臻景福伏惟某官言比說命智協蕭規
贊襄一德之訃謨鼓舞二儀之化育濟世仁厚議功崇
高上陪星拱之嚴下仰棟隆之吉道由方大已坐晉于
光亨神聽靖共宜來從於戩穀某屬縻州綬阻覲泰階
第深慕用之誠曷究勤惓之禱

賀樞使冬啓

乾坤之大陽盛則君道昌日星之交復亨則邪類息宣
壑底滯孳萌惠和況乎聖賢相逢靜交養助天長育
喜開剛長之端持國權綱會履陰消之漸矧同品彙皆
玷洪鈞致慶之勤擘牋敢後恭惟某官為國元老柄時
洪機著龜本朝領袖百辟疇諮大政常警悟於上聰董
輅中樞已救寧於國步惟是丞弼之列遜於才資之明
特立獨行不變風尚清名健節自移囂浮者哲奮庸盛
世增美朝冠野憤旦頌夕歌人方具瞻天必眷佑乘茲

日至之始宜有神休之儲某拜慶不遑冥中以禱

賀參政冬啓

闕名

陽既潛萌氣應黃鐘之律日方南至瑞符太史之占顧
茲來復之辰宜享彙征之福恭惟參政樞密稟天間氣
為時宗工正直提身忠誠許國遇中興之盛旦茂夾輔
之元勲式逢剛長之辰羣英退聽茂擁朋來之慶諸福
駢臻

賀侍從冬啓

闕名

反復其道始知天地之心齋戒以寧蓋待陰陽之定在禮可賀于時為宜恭惟某官道直而方氣剛以大功濟乎世將作傳說之霖德媚於人可愛趙衰之日肇復朋來之慶茂膺難老之祥某叨守海邦阻趨屏著捧觴上壽莫瞻君子之光儀荷橐增輝敢頌賢人之久大

賀侍從冬啓

闕名

律應黃鐘運達子位為天地資生之始乃君臣受福之時恭惟某官柱石元勲著龜舊德處朝廷以正直安天

下以惠和偉然事業之光華休有神明之協相茂迎令
序倍格庀禧大賚善人方允升於高位永錫難老將久
庇于生民某限守州符阻趨鈞屏

賀給事冬啓

闕名

一陽來復天序靡差百福咸臻物情胥悅恭惟某官衣
冠令族文物高流游息詩書頗得名教中樂出入諷議
自是天子邊人履茲亨辰宜膺峻擢某行歸故里尚借
餘光滯此一官阻于數舍夢隨賓客共稱賢聖之觴心

掛門牆但祝松喬之壽

賀客省冬啓

闕名

亞歲令辰書雲吉旦方天陽之氣至宜君子之道亨恭
惟某官器術疏通才謀沉遠矧久臨於要秩茲益茂於
勞能佇陟寵榮冀加珍衛

賀帥使冬啓

闕名

伏以玉律飛葭驗黃鐘之氣應靈臺觀象當昴宿之星
中恭惟某官峻德自天純誠憲道聳具瞻於百辟宣讜

議於三朝屬此盛時有裨鴻化暫憇蕃宣之地即還丞
弼之司上翊隆平以符譽望方初陽之貫序宜休福之
在躬某阻奉慶觴第瞻賓廡其為系頌尤劇蘊悰

賀帥使丞相冬啓

闕名

伏以一陽來復萬寶肇萌周正肇紀于天元魯史仰瞻
于雲物伏惟某官受天間氣為世鉅人輟巖廊之鈞衡
司留都之筦籥龔黃政事茲以洽於輿言稷契謀謨即
亟還於宰路履茲穀旦萃止殊祥某遜守州符阻陳賀

等其為祝頌實倍等夷

賀帥臣冬啓

闕名

微陽肇復庶物更新蓋祓不祥逐羣陰而盡竄道迎多
祐乘一歲以俱亨宜有神休來相賢業恭惟某官儒紳
元老禁苑名臣久著望於朝端暫偃藩於方面利有攸
往道已應於朋來罄無不宜福將迎于朔至竚承節召
入輔帝猷某限守州符阻趨賓次

賀帥臣冬啓

闕名

伏以上圭測景肇迎日至之長玉律飛灰潛應陽米之
候恭惟某官先生維嵩孕秀火昴儲精量涵萬頃之陂
材挺千尋之幹早見知于當宁俄出鎮于名藩想茂對
於嘉辰宜倍迎於介福某孤寒薄宦依仰巨庥禮莫遂
於鳧趨門牆冀遠誠少伸於燕賀竿牘徒勤

賀帥臣冬啓

闕名

一陽資始萬物更新發施天地之和敷錫君臣之福恭
惟某官生民先覺命世上才摠節制於東州坐消姦慝

宣詔條于屬吏盡格循良坐迎日至之長茂擁百祥之
助七日来復宜君子之階升三節以趨將龍光之無被
某限拘符守阻造賓墀

賀帥臣冬啓

闕名

三務成功再謹天正之候七日来復是昭陽德之亨扞
邊方倚於長城介福宜隆于亞歲恭惟某官功存社稷
力保封疆緩帶輕裘久重岷峨之勢高鋒長轂即清灞
渭之塵方同敵愾之勲宜享履長之慶觀臺望稷將盡

洗于兵氛樽俎折衝願永綏于壽嘏參承尚阻欽頌良勤

賀帥臣冬啓

闕名

周正授歲取鐘聲律度之和漢史占天見璧月珠星之次方此陽暉之長實惟賢德之亨恭惟某官學造淵源才周經緯建旄分閫已分成服之勞正笏垂紳方踐中臺之任順此履長之慶適當促覲之期崇論宏言蘊忠誠而入告隆名異數與剛德以偕升瞻祝之誠敷陳罔

既



五百家播芳大全文粹卷二十六

欽定四庫全書

集部

五百家播芳大全文粹卷二十七

詳校官編修_臣謝振定

助教_臣常循覆勘

總校官編修_臣王燕緒

校對官中書_臣葉蘭

謄錄監生_臣張護

欽定四庫全書

五百家播芳大全文粹卷二十七

宋 魏齊賢

葉 棻同輯

賀啓

賀冬

賀總領冬啓

緹室飛灰，轡奏仲冬之律。觀臺候氣，史書至日之雲。顧

晷運之推移知善祥之叅會恭惟某官勲庸時懋道德
日隆久更事任之華備著猷為之美總邦財於六路坐
究盈虛循天合於四時靜安消長屬當亞歲倍擁殊休
某偶佐郡條阻瞻使節奉觴為壽莫陪下客之趨與國
同休敢後輿人之祝

賀總領冬啓

緹室飛灰當一陽之來復清臺課厯正萬物之資生福
以類升道因時長恭以某官譽推人傑行協天心卓然

王佐之才允矣公輔之器暫統綏於六路爰刺舉於百
城攬轡馳驅覩使星之輝彩摩霄翔翥覺卿月之騰輝
茂擁繁禧坐凝順履某叨居都邑託比部封引領崇墉
莫遂鳬趨之願寫心短牘聊伸襪獻之誠欽頌惟勤占
詞罔既

賀漕使冬啓

觀象靈臺日初躔於北陸飛灰緹室律已應於黃鍾君
子攸宜福祿是荷恭惟某官養氣剛大凝姿粹和挺秀

儒宮素博通於經術飛聲仕路久益奮於材猷妙簡宸
衷屢叨使指七日來復適丁剛長之辰三節以趨佇慶
大來之吉某限居官守阻造行臺瞻頌惟勤敷宣罔既
賀漕使冬啓

玉歷頒冬璿杓挿子眷一陽之令節屬千載之昌期恭
惟某官才猷敏飭學術深純綿歷居多委寄攸重聲華
傾于衆望功業見乎有為豈惟飛輓之權可究經綸之
策道大來而小徃時陽息而陰消茂擁繁禧坐凝順履

某叨居郡佐託比部封引領崇墉莫遂鳬趨之願寫心
短札聊伸襪獻之誠欽頌惟勤占詞罔究

賀漕使冬啓

土圭測暉肇景長於華晷雲臺書瑞瞻歲美于康年伏
以某官聖世徽才士林懿範蹈忠嘉之全德周劇易之
良能宣使指於關河足兵儲於郡國聲馳諸部風動屬
城即最課于黼帷膺渙恩于綈檢履茲昌序茂集蕃禧
某阻致慶於壽觴第馳誠于賓廡

賀憲使冬啓

一陽起于黃鐘實為生物之本三正肇于天統爰修亞
歲之儀伏以某官蘊識精微持心端厚士林孰出其右
朝廷當器其能華省專曹已久更于事任輶車折獄固
共仰於德輝茲履昌辰併膺繁祉佇彼絲綸之寵入躋
臺閣之嚴某徒切詠瞻莫遑展慶其為企頌曷既喻言
賀倉使冬啓

伏以五始謹元肇先於天統一陽來復初暢於葭萌伏

惟某官德宇淵淳天資粹美受兼人之術畧稟照物之襟靈阜財每蹈于中和按部共稱于信厚宜因令序進陟寵章某阻致慶於壽觴第馳誠於賓廡其為禱頌罔喻惓勤

賀倉使冬啓

肇復一陽潛萌萬物應書雲之觀望增化日之舒長仰矚使華倍祈天祉恭惟某官才資高遠德性溫恭結明主之深知聯外臺之要職訓齊法守開闢利權聳人望

之日崇宜神休之有相三微正始方協慶于令辰百福
應期佇進膺于嘉命某限居官守阻造賓堦無任傾依
祝頌之至

賀監司冬啓

化國之日舒以長一陽來復君子之道溫而理萬福攸
同恭惟某官志在澄清動惟剛健如冬可愛易消窮谷
之寒與時偕行放盡孤根之暖德肖雲臺之瑞威留吏
膽之水夙吉有功已作觀風之李固朋來無咎更為入

覲之韓侯某徒寘柔函莫追賀客三年官學屢經節物
之蕭條數仞門墻欲探陽和之消息

賀監司冬啓

一陽來復見天地之因時五福類升知賢人之得志恭
惟某官高風邁世卓行名家養素丘園已擅雲林之秀
發身霄漢遂分使節之華茂對亨辰宜膺寵祿某竊食支
郡繫職下僚再拜奉觴莫綴曳裾之列千春祝壽但馳
染翰之勤

賀監司冬啓

四時成歲肇見天正七日告期潛升陽德惟一元之資
始見萬彙之向生伏惟某官才冠一時能兼數器鷹撮
盧擊凜施設之可觀羊狼狼貪紛遁逃而遠去風政其
異善最推高履茲新陽宜有厚福某竄身榛莽弔影江
湖望一丈之芳筵阻陪廣坐非百函之妙手愧託尺書

賀監司冬啓

日次南躔氣萌北陸時即仲冬之月厥惟亞歲之辰竊

以某官挺膚敏之才擁光華之節宣勞於外既漕計之
辦敷降旨從中宜禁途之進陟適茲穀旦介彼繁禧某
領郡攸拘造門是阻其於欣詠罔究指陳

賀監司冬啓

新陽初復已潛育物之心君子道亨宜享自天之祐伏
以某官深仁及物令德持身顧外補之淹回正興言之
嗟鬱某末由祇慶先沐貽書頌詠之私敷宣罔既

賀判府尚書冬啓

清臺課歷迎長至於日躔妙律均聲導太和於天統伏
以某官賦材闓爽秉德靖共文陛決科自致羣英之右
禁林視草可追兩漢之風惟聞望之久隆矧眷懷之素
厚比緣請外暫適均勞倚重蕃宣已報龔黃之政總釐
部省行觀姚宋之能履比泰辰倍迎殊祉弗遑為壽第
切馳誠

賀判府龍圖冬啓

伏以卦起中孚日臨南極咸具踐長之慶爰修亞歲之

儀伏惟某官德履純誠材猷通敏剴紛繁於中外能懋勉於初終職兼侍從之華任委蕃宣之重馳頌聲而載路諒戢穀之如茨矧茂對於天正宜密迎於神貺某屬居宮鑰阻奉慶儀頌詠之誠敷宣罔既

賀太守冬啓

天心來復七日之亨有初陽氣潛萌萬物之生以此茲謂履長之慶宜膺多福之祥伏惟某官性稟純誠識窮至蘊講明道德是惟舊學之臣啓沃謀猷蔚有嘉言之

告暫遂偃藩之便已勞側席之思即膺圖任之求庸慰
具瞻之望某顧慙衰朽方卜退藏自期田畝之獲安惟
幸仁人之在上傾依祝詠永集棕靈

賀太守冬啓

微陽肇復庶物更新盪祲不祥逐羣陰而盡竄導迎善
祐乘一氣以俱亨宜有神休來相賢業恭惟某官儒紳
夙老禁苑名臣久著望于朝端暫偃藩於方面利有攸
往道已應于朋來罄無不宜福將迎于類至竚承節召

入輔帝猷某限守州符阻趨賓次

賀太守冬啓

伏以葭管飛灰律應黃鐘之候魯臺觀象史書雲物之
占惟德履之考祥宜神休之薦祉恭惟某官體性而靜
據德而純行膺當宁之求暫屈專城之任甫臨穀旦大
集洪禧某幸託巨休獲安下邑欲捧觴而莫遂但馳頌
以彌深

賀太守冬啓

竊以亞歲迎祥新陽協序氣肇三陽之始福臻百順之名恭以某官廊廟宏才圭璋偉器早被九重之眷暫持千里之權茂對令辰宜膺簡福某限拘官守阻造賓閔躬拜壽以無階徒望風而有祝

賀太守冬啓

伏以周歷紀元協斗杓之插子魯臺觀象書雲物之呈祥君子履時神明介祉恭惟某官道偕陽長德與日增儒林夙藹於聲華仕路咸遵於矩範暫處分符之任茂

著宏休行歸侍索之珎大攄素蘊宜逢亞歲茂集繁禧
某限佐邊疆阻趨屏著莫遂壽觴之慶其如願望之私

賀太守冬啓

一陽滋進百福駢臻方深企詠之誠遽沐周詳之問恭
惟某官篤修德履敏裕物情茲典領于州符已康寧於
民瘼益希保衛以佇寵光

賀太守冬啓

伏以卦首中孚日臨南極寶典紀踐長之慶史官書望

瑞之占伏惟某官文武全能忠嘉厚德以學術藻飾吏
事首映士林以行業輔翼政機睠深宸扆暫均休于巨
屏豈久鬱于具瞻屬履嘉辰倍膺殊祉亟登元鼎以耀
泰階某屬守隣藩阻伸慶筭永言馳頌罔既抒陳

賀太守冬啓

愛景初長式接璿璣之度新陽肇復順迎玉律之光允
宜大賢茂迎純嘏自天降祐與國均休恭惟某官據德
之純體性而靜暫屈專城之寄行膺當宁之求亞歲甫

臨洪禧攸介某備員下邑阻造臺閣但馳頌以彌深欲
捧觴而莫遂

賀太守冬啓

伏以律推定候復萌地之一陽厯考常經會麗天之七
曜恭惟某官賦材端飭鍾性敏明親迎熙洽之盛朝躬
奮經綸之偉業暫淹俊躅遠駕侯轡平昔聊城已著去
思之頌乃今沂水側聆來暮之歌方順蹈于休辰宜具
膺于純嘏適茲展慶遽爾拜嘉欣與愧并意非言盡

賀太守冬啓

鳳鳴嶰管肇移緹室之灰蟾伏藥淵初養廣寒之魄于
時而復以道則亨恭惟判府中大政為吏師器蘊相業
厚德暖物真宋廣平所至之陽春和氣襲人如趙成季
可愛之冬日維茲三極茂擁百祥某遙望光符敬伸輿
頌五日從樂獲覩迎至之儀萬福來求敢効履長之賀
賀太守冬啓

氣應黃鐘肇紀天元之建景旋南陸茂迎日至之長竊

惟眠履之休宜享彙征之福恭惟某官高名映世雅量
絕人釋省闈之徊翔均輔藩而偃息政流民悅協應宮
聲之和德與時行仰如雲物之瑞甫臨嘉序茂集繁禧
佇三節之召還偕一陽而來復顧誦言之雖切悵謁賀
之無由首辱移書益深銘德

賀太守冬啓

舜璣觀象迎長至于箕踞鄒律吹灰肇太和于天統陰
窮于剥陽復而升正君子之大亨與廟堂之均泰恭惟

某官才猷應世聞望高時抱忠義於邦家勒功名于典冊比分閫柄亟騰威畧之聲旋偃便藩益著循良之政式遵令序宜茂繁禧即召近密之班以輔太平之業某方祇行役將遂參承欣頌交深敷宣罔既

賀太守冬啓

日極南訛星占東壁惟陽德來復之始乃善人奮迅之秋恭惟判府侍郎德冠朝倫才高藝苑三槐論道行登鼎鉉之司千騎班春暫寄股肱之郡履此亨嘉之序宜

膺壽福之祥某叨預官聯僻居郊野望長裾之賓客莫
並趨陳企雄戟之門闌徒深頌詠

賀通判冬啓

伏以君子明時方慶一陽之復古人為善宜膺五福之
歸恭惟某官遠業濟時高才華國半藩宣化暫淹龐統
之才紫橐還朝式展魯恭之政嘉辰茂履戩穀來綏某
郡綬所拘椒觴阻奉莫趨陪于賓宇但瞻仰于星躔傾
願之深敷宣罔既

賀通判冬啓

伏以雲紀觀臺咸仰非煙之瑞繡增宮線共欣化日之
長陽氣肇升君子需慶恭惟某官公輔之器邦家之光
別乘暫淹即播海沂之詠賜環榮詔定為廊廟之才順
履昌時茂迎純嘏某試官邑尉託比雲天阻為賤職之
拘莫廁賀賓之列但勤祝頌難盡敷宣

賀通判冬啓

伏以珠星璧月祥方契于天元玉律黃鐘氣已交于南

至當一陽之來復集百順以駢臻恭惟某官學際天人
識探繫象蹇蹇王臣之節謙謙君子之心別乘風流雖
翱翔于半刺佩刀氣象已兆朕于三公履茲迎日之長
宜錫自天之祐某職拘匏繫慶阻臯趨遥跂台躔第深
善頌

賀通判冬啓

肇序一陽候應黃鐘之律潛萌萬寶卦當來復之辰君
子攸宜吉人為善恭惟某官持心厚重稟量恢宏太羹

元酒而斯文自醇璞玉渾金而所養尤粹屏星絢采聊
密贊于褰帷鳳閣摘華即顯觀於調鼎履此亨嘉之會
倍膺純嘏之休某仰託鴻恩備員屬吏阻趨大厦第增
燕雀之誠遙望崇墉恨隔雲泥之勢其為占頌曷勝敷
陳

賀通判冬啓

元陽肇復愛景初長魯臺有雲物之書鄒律驗氣機之
應君子所履福祥存臻恭惟某官道與時亨德偕日進

夙藹朝紳之譽行持從索之榮半刺分憂已共綏于遠
俗十行頒詔即入覲于清光蓋衆論之攸歸宜百神之
交相某備員倅貳托迹幷幪無緣台屏之趨莫獲壽觴
之獻其為祝頌豈易敷陳

賀通判冬啓

律變黃鐘驗一陽之肇統日行遠道周四格以騰輝千
載應期四方交泰恭惟某官嘉猷經世碩望冠時實朝
廷之羽儀為縉紳之領袖同流王化聊處治中弼亮天

工用攄遠業當茲令序宜擁殊禧某未躬賀厦之勤徒切望雲之劇欣懼交集叙陳曷同

賀通判冬啓

周正協子方肇氣于黃鐘堯日迎長遂旋暉于南陸盛儀亞歲吉履逢辰伏惟某官碩德茂民宏才緯世夙負經綸之志茲當刺舉之權與國同休將益隆于睿眷如冬可愛亦允契于羣情佇觀百祿之是邁式應七日之來復某坐縻巖邑阻造賓閣頌詠徒深敷宣罔既

賀通判冬啓

玉管召陽土圭測日推初萌之載始嘉道長之方來君子對時神明協慶恭惟某官靖恭秉德直亮端懷早膺中宸之眷求雅為多士之師表暫資賢望出佐方州宜民之謠既誼聞于載路自天之祐方順履于迎長竚奉褒恩入躋近輔

賀通判冬啓

書雲應候測景踐長方陽德之時升宜君子之道長恭

惟某官性資宏厚器識䟽明暫關決于名藩將升躋于華胄俯迎令節倍格繁休方修拜慶之儀遽辱飛緘之賜但勤頌願尤極感銘

賀通判冬啓

連珠合璧密契于昌時候氣占風前知其善歲一陽來復五福類升恭惟通判大夫世載勲庸家傳忠孝化民成俗已高循吏之風決事如神復見古人之政履茲令節宜擁純禧某猥以衰孱繫于職守攝衣以往未獲于

升堂跪酒而前莫陪于獻壽

賀冬啓

天元肇建氣應黃鐘至日舒長景旋南陸竊惟視履宜
享殊休恭惟某官大雅典刑措紳耆舊宜民厚德協應
宮聲之和映世高名仰如雲物之瑞甫臨佳序茂集繁
禧佇聞三節之召還偕與一陽而來復首蒙賜問益厚
銘藏

賀冬啓

黃鐘肇始周開建子之祥朔日正南魯謹書雲之禮諒
履長于亞歲當倍擁于殊祥慶牘未修華緘首貺曲示
課勤之意第深銘佩之私

賀冬啓

伏以陽交來復寅賓化日之長慶禮交馳申篤善鄰之
好恭惟某官祥繇履考道協泰通茂膺諸福之歸用對
三微之始某坐縻印紱阻造門墻惟頌禱之至深在叙
陳而奚既

賀冬啓

節啓天正既辨五雲之物時惟吉士是膺百福之祥恭
惟某官秉德渾剛賦姿明果文華綺散名馳羣俊之先
論議風生意出諸儒之表宜膺殊祉茂對亨辰某攝領
部章阻趨臺府奉雕觴而跪席莫預獻酬汗青簡以占
詞徒傾頌祝

賀冬啓

月臨天統首冠于三正氣兆黃宮復來于七日候微陽

之協至卜君子之景征伏惟某官碩德茂民傑才經世
踐揚中外之寄益惟望實之隆既醉太平實具周書之
福大有上吉允符義易之占某恨以守邊未遑稱慶徒
深善頌莫罄鄙懷

賀冬啓

伏以物壯則老肅殺所以成歲功否終必傾來復然後
知天意凡在含生之類休有向榮之心伏惟某官履信
體仁秉德迪哲才無施而不可道得時而愈隆方當彙

征元吉之辰宜享既醉太平之福某限居官守阻候門
牆瞻頌之深敷宣罔既

賀冬啓

伏以候緹室之清宮瞽告以日卜臺觀之黃稷史書有
年共安消長之來以待陰陽之定伏以某官才猷傑異
道德深醇靖共正直之休順獲天人之助某恪守官次
阻稱壽觴坐馳傾向之心莫罄安榮之遇

生日

賀秦相生日啓

崔公巽

歲序收功已報新春之喜嵩靈孕秀庸昭間世之祥藹
佳氣於門庭播英聲於寰海夢熊協旦賀燕均懽恭惟
某官隆棟殊姿元龜卓識為聖時而特起鍾賢運以挺
生至大至剛氣塞天地惟忠惟孝道通神明以經綸之
長才建社稷之遠慮諫行言聽謨明弼諧果立非常之
功永有無窮之問國鼎增重椿齡愈新名世五百餘年
固已上符于伊尹中書二十四考殆將遠過于汾陽某

夙被埏鎔阻趨牆仞式歌且舞第勤祝頌之誠俾熾而
昌益大期求之慶

賀秦相生日啓

王叔子

嶰管葭灰甫近春陽之載桑弧蓬矢式符巖石之瞻喜
動冕旒歡均簪紱竊以天生李晟來為萬人嶽降甫侯
出藩四國昂依漢日箕作商霖毓司隸于元精孕謫仙
于太白歷觀前古類產英材矧惟趙氏之昌率致周邦
之喜五龍陰受天開夾日之祥一馬潛浮神起渡江之

役黃旗撫運赤紱膺符宜有真儒來扶景祚恭惟某官
氣全剛大性達神明日角珠庭稟自鍾山之秀錦心繡
口疑從沫水之清衛社稷不假于干戈行蠻貊殆憑于
忠信自專釣軸密啟皇猷和戎狄以正諸華矢文德而
洽四國息甘泉之烽火盛璧水之衣冠祭講燔柴耕陪
載耜惟至治之君不世出也待以勿疑故仁人之言其
利溥哉動無弗合命膺華袞執有元圭已建上公復居
真相禮樂侍御美秦仲于車鄰規諫文章配武公于淇

澳茲承穀旦倍擁繁禧一人頒湛露之恩四海述閟宮
之頌祝仁者壽俾熾而昌衍金玉友之榮積桂子桐
孫之慶莊椿不老八千歲以為春秋周鼎同扶七百年
而卜世箕某輪囷蟠木局促轅車轉漕潼江考方書于
下下歸耕潁水田矧種于中中豈謂洪鈞復取棄物方
征車之遠邁陪賀屨以無從星現老人永占祥于南極
日尊師尹長寄目于東方慶抃之私敷宣罔既

賀秦少保生日啓

李舜臣

柔風淡蕩景遲化日之長佳氣鬱葱兆應元精之瑞門
庭萃慶朝野交歡恭惟某官金玉天資棟梁國器洒落
風塵表物飄逸神仙中人清世英髦千萬人而傑出黑
頭台輔五百歲而間生不唯吾道之主盟抑亦生人之
司命逢時而泰與物為春勲德兼隆宗廟與同休戚精
忠昭格神明所共扶持某罪戾孤蹤依棲洪造邇風慕
義欣逢弧矢之辰滌硯薰毫虔奉椿松之祝其為欣頌因
既敷陳

賀丞相生日啓

張正己

五百年而名世有開合德之符八百歲以為春願罄大年之祝紛賀僚于太府錫備物于公朝四海傾心一詞
贊喜恭惟某官稟天地中和之氣應聖賢亨泰之期名
在圖書夙號中興之佐志安社稷獨成不世之功援斯
民于水火塗炭之深登太平于禮樂文明之盛壽域亘
八荒之表金城為萬世之安方國家卜世以無疆宜福
祿自天之未艾慶傳衮舄封誓山河釀滄海之水不足

以飲公之勲汗南山之竹不足以紀公之德階符同耀
拱宸極以常尊神嶽比崇鎮坤輿而益固永隆國壽共
對天庥某猥以么微久叨鈞播望公孫之賓閭莫廁下
僚歌史克之頌詩第傾善祝

賀張叅政生日啓

日逢弧矢年迂松椿有是君有是臣亶為千齡之盛旦
俾爾昌俾爾艾長觀八月之清秋樂事駢闐驩聲環匝
恭惟某官儲精嵩嶽毓秀荅川碩畫元勲久增光于政

府沉機深識獨軫念于邊庭雖一時議論之靡諧奈百
世聲名之益壯雲靈既掃日月分明爰誕告于治朝以
寵還于書殿獨茲均秩共以為疑與其抱高明之節而
枕石漱流豈若舒久鬱之才而興雲出雨亟符夢燕入
相袞龍發舒未究之才猷揚厲無前之勛業某比聞褒
渥聊壯慶緘犯顏宜掇于深辜藏疾已欽于雅度報章
下逮餽禮有加坐令山房岑寂之區如得洞府珍奇之
玩有懷銘刻無語發揚屬逢誕日之臨敬拜長年之祝

捧觴稱壽雖不陪賓客之塵舐鼎得仙猶足以解塵埃之縛

賀李帥生日啓

張文饒

始生令旦表瑞中秋會辰于角亢之間壽星既見占夢以熊羆之兆男子呈祥是惟不世之賢蓋亦應時而出凡叨屬吏展慶今朝恭惟某官嵩岳儲神珠躔毓粹流光天上昔為漢殿之星辰肖像人間將作商巖之輔弼暫煩共理式重于蕃民游愛日之中吏畏肅霜之下威

聲遠暨澄清南海之波誠意旁通霑足西郊之雨仰茲
厚德宜錫遐齡歲俾有千當繼僖公之頌福陳嚮五式
符箕子之言某僻守遠方阻瞻大厦紛紛鶴蓋相同非
霧之陰赫赫龍門莫遂披雲之便

賀胡帥生日啓

宋祁公

周室中興岳儲神于山甫漢高崛起昂應識于鄧侯是
惟間世之英蓋亦為時而出聿逢聖運宜有儒臣茲慶
誕彌伏深抃賀恭惟某官天麟表瑞閣鳳呈儀仰之高

而鑽之堅彌諸中而彪諸外其間必有名世式契休祥
正可求之古人是為倫輩殆天所授舍公其誰暫勞屏
翰于坤維即正鈞鎔于天下上心所屬公議攸歸衛武
公九十五齡猶陳懿戒廣成子千二百歲坐進長生某
限守郡符阻趨帥府葱葱烟霧莫陪賀客之紳衿栩栩
夢魂不遠崇閔之牆仞

賀王帥生日啓

王叔子

維岳儲靈式誕佐王之輔蒞淮流慶允光濟世之謀惟

叅幹于繁機方翊躋于景化誕辰茲及延禱兼常恭惟
某官慮總戎韜績宣邦社奮嘉猷而克壯申吉祿以咸
宜蓬矢在門緬懷于光慶野芹實篚願續于遐齡有少
輕塵具如別幅

賀林憲生日啓

帝賚弼而得說以輔商宗岳降神而及申用強周室凡
厥中興之運挺生傑出之才大火既流颯涼飈而屆候
長庚入夢踵仙曹以呈祥振古如茲殆天所授仰景星

之下燭屬誕日之載臨叨在庇休伏深抃賀恭惟某官
學優聖域文擅儒宗早登片玉之科素積渾金之譽言
不慙而行不恥沛然所養之醇仁也柔而義也剛允矣
兼質之美道直而婉謙尊而光大聲遺節奏之間至寶
出雕鐫之外停澆激薄咸推長者之風忍垢納汙深得
大臣之體肅持金節榮煥繡衣親愛日于三冬畧無霜
霰泛汪陂之萬頃不起風波平反留獄之冤民開釋弄
兵之赤子豈若京師震恐先事埋輪當令四海澄清不

忘攬轡所務循循于中道不為察察之威名諒著陰功自延
遐壽惟厚德則享其富故作善者降之祥衛武公九十
五齡猶陳懿戒廣成子千二百歲坐進長生將欲比方
實為倫等某聞四方之士蓋積有年得萬世之師創見
此日自困塵埃之役幸披雲霧之瞻恭遇生朝敢陳告
語嘉賓濟濟願陪鶴蓋之陰大厦眈眈竊倍燕巢之賀

賀陳漕生日啓

楊祐甫

生山甫以保周岳神降祉配蕭何以佐漢鼎宿流光功

名間世而益彰壽考為時而難老爰愛垂弧之日正瞻
析木之祥凡屬庇庥悉深抃賀恭惟某官性根溫厚識
造淵微裁剝不留稟若太阿之一斷表儀斯重巍然象
鼎之萬鈞推舉賢薦善之至誠試富國裕民之大畧宜
膺戩穀獲助神明揚使節以嘉聲乃德門之素業世濟
其美有後皆曰臧孫人莫與京其昌必在敬仲茲承餘
慶上卜遐齡幸仰覲于生朝實難忘于告語某幸乘偏
壘阻造外臺想冠蓋之如雲隔門庭之非霧顏之既厚

尚依長孺之二天誠則有餘更頌僖公之千載

賀趙主管生日啓

葉元茂

天潢稟潤崧岳儲靈律中綈賓適應凱風之候時生英
傑光開彌月之祥敢以謏聞敬由起頌竊以神明之胄
所稟特異忠孝之家其慶有餘方將貂續以蟬連宜得
鳳鳴而龍躍增光玉牒來自神仙中人孕秀金枝迥出
風塵表物尤古今之未見以君臣而並生飛電繞樞已
慶千秋之節長庚入夢獨賒五日之期與社稷同無疆

之休實天地鍾元精之氣備此衆美惟公一人恭惟某
官行峻履方芒寒色正朱虛之忠而東平之善江夏之
略而河間之賢廼被服于儒術之中而議論為宗社之
冠彤庭入衛行促近帝王之居青山自怡姑笑傲仙佛
之窟宜佩長生之籙願賡難老之章五百歲春五百歲
秋未多楚木一千年花一千年實幾度蟠桃某乾坤腐
儒門闢下士欣逢穀旦庸竭菲誠謦效親承窺寶苑莫
傳之秘年齡仰祝伴瓊臺不古之春

雜賀

賀駕幸丞相府啓

元戎萬騎星拱轅門清蹕一聲天臨相府協千載明良
之會應三階平正之期都人踴躍以聳觀書契傳聞而
未有恭惟某官國家柱石人物著龜斷朝論于片言睦
鄰好于兩國係四海安危之重當九重弼亮之專澤被
生靈功存社稷殫天下之竹帛莫紀元功播堂上之韶
鈞難形盛德雖蠻貊咸服其忠信顧草木共識其威名



務崇不朽之休宜有非常之錫宸衷睠睠每覆燾其如
天廣厦津津冀併懔于永世恩誠渥矣榮莫大焉某庀
職海邦親逢盛事莫預具瞻之列徒懷喜躍之私

賀丞相賜宅啓

劉子淵

位隆一相長瞻穆穆之清光寵冠三公宜錫潭潭之甲
第仰認併懔之大德式昭覆冒之鴻恩眷出宸衷驩騰
輿論恭惟某官智周萬物學貫三才高勲銘在于鼎彝
雅量宏吞于溟渤措邦家于磐石安社稷于泰山潤色

皇猷主張國是斷鼇足以立四極品彙更生煉媧石以
補蒼穹乾坤再造輿地收還于禹貢威儀復見于漢官
綽有休聲曼無前比致唐虞之極治弼諧允賴于臯夔
告文武之成功佐佑實由于周召某叨持使節祇按海
邦徒傾燕厦之私心莫預龍門之賀客瞻依倍切敘述
奚殫

賀張丞相平湖南寇啓

劉林宗

用申伯以柔萬邦昔著周宣之美倚晉公以破三賊復

彰唐憲之勲聿觀今日之元功無若我公之嘉績爰整
其旅清夷千里之波式遄其歸宰正萬機之務中外所
注神人載欣伏惟慶慰恭惟某官一德享天孤忠衛上
望重璣衡之正謀符著蔡之靈仁也柔而義也剛綽有
中和之氣文足昭而武足畏恢張遠大之圖屬當荆渚
之衝人有潢池之盜仰煩上相出董銳師既欣康樂之
江山一歸節制豈獨淮南之草木亦識威名運指顧旬
日之間致招降五方之衆忠者懷而畏者服無勞禦寇

之兵綏斯來而動斯和誕布好生之德風濤改色旌纛
生輝錫盾彫戈人競傳于振旅袞衣赤舄世切賴于洪
鈞行受恩綸永藏盟府某方勤饋餉喜獲救寧豈特紓
鄰路之憂行將慶中原之復

賀張丞相平寇啓

奏凱旋師奉圭入覲霽萬口同聲之譽被十行細札之
書錦衣繡裳備三公之典冊碧油紅旂瞻上相之風稜
慶在一人重增九鼎恭惟某官道兼文武身任安危回

日馭之再中幹斗樞而獨運已斷蚩尤之肩臂請臬袁
尚之頭顱思定中原誓平北寇奮身犯難櫛風沐雨者
五年決勝運籌折馘執俘者萬計張尚父鷹揚之氣挫
敵人虎噬之心若堂上之兵不嬰其鋒則關中之利已
非我有顧猛虎在山之若此乃飛鴻遵渚之謂何爰命
召公尚期疆理于南海降予伊尹又約左右于商王某
夙倚門牆晚蒙陶冶假以兩路召軍之檄脫其一家垂
死之軀豈期流落之餘生復聽遙歸之新詠屬以深居

岩壑自遠光塵馮謖之出無車原憲之貧見肘蹇驢肯
借尚吝于東家稚子候歸更迷于前路用莫趨于台席
結轉激于蓬心遐睎海鶴之姿共覩風雲之會衛武公
入相曾無菰竹之篇仲山甫永懷但誦清風之句

賀沈帥平海寇啓

劉林宗

遣將受成選徒北伐先聲所被肅靜貔虎之威羣醜自
攜即正鯨鯢之戮神靈慰悅民吏懽呼竊以宣力四方
式重藩維之寄折衝千里欲觀帷幄之謀不有雋功孰

明妙畧執俘折馘有嚴帥聞之尊飲至勞旋大秩賓筵
之禮暑風薰穆氣象清明恭惟某官才為時生智因機
顯周邦召虎獨高江漢之詩唐室晉公宜有淮南之雅
昨屬方隅之謀帥寵膺召節以造朝親奉玉音謂我圖
于南土恭承天獎煩君重于淮陽自紺幘之來臨肅黃
堂而共理教條寬簡民俗阜安乃航海之愚民乘止戈
之暇日掠輕舟而及境鼓惡少以弄兵爰遣偏裨出平
兇人被堅執銳方賈勇以爭先振旅凱還忽成禽而歸

報緬想捷書之上倚須顯賞之行即奉明綸進持從橐
非敢為佞也斯拱而俟之某率比備官親聞盛事觀魯
侯之在泮既覩獻功誇公綽于中朝自知增氣

賀陳憲平寇啓

戴翼

螭坳錫命龍節陞榮奏節至三喜悉平于羣醜論功第
一宣峻陟于穹班塗詠交懽臺治愈煥恭惟某官精神
秋水談笑春風暗合兵書料賊無如料敵指麾介士擒
寇而必擒王籌策定于樽俎雍容之間號令行于賞罰

嚴明之際風走十八灘之曉鏡淨潢池天回一十郡之
春鋤耕綠野捷書來上朝論聳聞更生幾百萬之窮民
冕旒喜動接武八十一之元士繡斧光增第師中之錫
未償厥功必席前之問始究所學外勞如許寧淹原隰
之載馳中召皆來行見朝廷之大用某身拘雷邑心繞
霜臺側聆恩褒喜倍等倫合先馳于慶牘愧邈在于偏
陬首用先生作棟梁此日發西江之輶不以下體采封
菲異時歸東閣之鈞

賀陳丞相從駕回啓

熊子復

伏審扈蹕江畿亟掃穹廬之跡還轅吳會益恢巖廟之
圖折衝已賴于精神厲節方加于體貌當此春陽之駘
蕩諒有神明之護持竊以益贊禹而征苗致兩階干羽
之舞尹相湯而伐夏併三朶寶玉之俘惟其佐有真儒
所以動無強敵比屬璫表之侮肆陪鑾輅之征圖回皆
中于事機宴衍遂平于亂畧相武王而肆伐既推尚父
之謀震徐方而還歸宜誦太師之烈恭惟某官才高帝

賚望重民瞻四夷玩掌而敵固在于目中萬卷蟠胸而
語寧專於紙上坐籌漢帳子房首冠于三人從幸渭橋
玄齡親率于六騎兇渠既殄醜類皆奔乾清坤夷既致
中原之定天旋日轉暫隨大駕之回成此鉅勲歸于真
宰某猥馳原隰阻覲門墻還豐而作周官佇慶三公之
拜畫河而為晉土豈惟十部之降願益展于壯猷用永
扶于丕緒

賀秦少傅拜掃啓

熊子復

伏以衮衣繡裳入視台階之峻路車乘馬出遊天塹之
雄暫除隅坐之雲屏真見還鄉之畫錦諒惟次舍必有
護持恭惟提省大觀文少傅德嗣格天功參播物美由
世濟漢相特盛于韋平傑本地靈岳神間鍾于申甫眷
異代帝王之宅乃元台父母之邦乾轉坤旋踵山東之
多相龍蟠虎踞控江左之上游謁告言歸承恩拜掃昔
相如乘使者之傳而返蜀縣令迎而先驅買臣懷太守
之章而還吳邸吏驚而出拜矧由宰路暫省舊邦是宜

列辟祖道之多諸侯迎候之遠上恩給千騎榮自耀于
三時高義散百金澤遂均于九族古今創見遠近聳聞
勝伯禽封魯之時止拜于後類山甫徂齊之日即過其
歸某遠拘馳傳之行莫展望塵之拜春華韶潤夏篆安
徐願攬秀于山川還秉釣于廊廟

賀秦少傅拜掃啓

熊子復

伏以肅秉孤篆祇掃祖塋戲斑衣而奉二親少輟庭闈
之樂賜錦袍而給千騎蔚為道路之光威容纔出于日

畿爽氣預回于天塹時方春物之駘蕩動有神明之護
持恭惟提省大觀文少傅望峻三階勲彌九鉉自孟至
賢而作相乃家慶之流傳生甫及申而有神本地靈之
秀發貳槐庭而多暇眷梓里以言旋鳳翥鸞翔侈皇恩
于寶軸龍盤虎踞覽王氣于雄都紆命袞而拜丘園揮
賜金而分宗族散宜生之迪教國人暫見于往來仲山
甫之遄歸王命仍須于出納某猥縻外計莫備先驅八
葉方來已驗青烏之相六飛清出更看白馬之迎騎火

宵紅錦衣晝耀願精調于公餽用益副于民瞻

賀叙復得宰啓

朱子真

近蠲藥石復莅絃歌羣疑果亡清譽益著伏以某官奮
身孤苦挺節端方未嘗枉尺而直尋不欲曲學而阿世
綵衣蘭膳歎胡廣之無違白髮青衫惜馮唐之已老比
捧毛生之檄來鳴子賤之琴志在真清俗有熙熙之樂
事輕矯飾躬無赫赫之名拙微効于安仁蚩頗興于卓
茂果招貝錦輒撓汪陂方市虎之可疑殆樊蠅之遂入

然流言固止于智而庸愬豈行于明旋聞核實之詳悉
辨鑿空之妄玉雖磨而非磷金在鍊而愈精即墨之毀
既消齊封可待中年之化不陋素忝過從曾微引手之
勞少解拾塵之謗喜而不寐空懷孟子之心名以益聞
顧乏曹丘之力貶損重望亟相緘題禮踰分以非宜詞
過情而為愧因人成事敢貪毛遂之勲反國非功願息
屠羊之賞方如簧之既露諒匪石以彌堅何病不容為
善最樂尚幾御時之令益安事道之誠庶蘭畹以滋芳

俾萱堂而底豫



五百家播芳大全文粹卷二十七